

स्व. इतिहास शिरोमणि बाबुराम आचार्य

नेवाः,

नेवाः भाय्

व

संस्कृति

साहित्यया मूलुखा

नेवाः, नेवाः भाय् व संस्कृति



स्व० इतिहास शिरोमणि बाबुराम आचार्य

१. नेवाः, नेवाः व नेवाः भाय्

२. नेवाःया प्राचीन मूल संस्कृति

अनुबादक



स्वयम्भुलाल श्रेष्ठ

पिकाक



साहित्यया मूलुखा

बखुं बाहाः, शहीदशुक्रमार्ग, यल

म्हापां- ५००

ने० सं० १०६६

मू— नितका

साभार— सितु पत्रिका १. दँ ६ ल्याः ३२, २. दँ ६ ल्याः ४६

थ कू— रत्न प्रिन्टिङ्ग प्रेस

इखाछे, यल, फो० नं० २१८७५

मधासैं मगागु छत्वाःचा खँ

नेपालभाषा - इतिहासया ज्वलंकथं स्व. इतिहास शिरोमणि बाबु-
राम आचार्यया निपु लेख मुना “ नेवाः, नेवाः भाय् व संस्कृति ” नामं थ्व सफू
पिथना च्वना । थुकिया अनुवादक भाषाजवा भाजु स्वयम्भुलाल श्रेष्ठ खः ।

थ्व निपु लेख - १. नेपाः, नेवाः व नेवाः भाय् २. नेपाःया प्राचीन मूल
संस्कृति - यको दँ न्हापा संस्कृतिक संघया पत्रिकाय् पिदंगु खः । लिपा हाकनं
“ नेपाः, नेवाः व नेवाः भाय् ” छपु लेख “नवकुञ्ज” पत्रिका बर्ष ५ अंक १
स पिदंगु जुल ।

थ्व निपु लेख-नेपालभाषाया निंति जक मखु, नेपाःया इतिहास निर्माणया
निंति न उलि हे महत्वपूर्ण जू । उकि हे अनुवाद जुया “सितु” पत्रिकाय् पिदंगु
जुइ - १. नेपाः, नेवाः व नेवाःभाय् - दँ ६ ल्याः ३२.

२. नेपाःया प्राचीन मूल संस्कृति - दँ ६ ल्याः ४६.

यथे महत्वपूर्ण लेख जुया हे निपु जक जुसां मुना सफूया रूप्य पिथनेगु ज्या
जूगु खः । थुकि -

१. नेपालभाषा कया क्याम्पसय् ध्वनाच्चवि पासापिन्त यको ग्वहालि जुइ ।
२. जाति भाषाया ममता दुपि सकसिनं ब्वने बहज् व, प्रेरणा जुइ ।
३. इतिहास निर्माण याइपि विद्वतवर्गया निंति छगू ज्वलं जुइ ।

अस्तु

बखुंबाहाः, शहीदशुक्रमार्ग, यल
नेपाल सम्बत १०९९ गुं ला ३०

छत्रबहादुर कायस्थ
अध्यक्ष
साहित्यया मूलुखा

नेपाः, नेवाः व नेवाः भाय्

१. नेपाल व नेवार शब्दया व्युत्पत्ति

थनि प्यसःदं [प्यंगू शताब्दी] न्ह्योया छद्म कवि नेपाल शब्दया व्युत्पत्ति यायेत 'ने' नांया मुनिया कल्पना याना नेनं पालन यागु देश जूगुलि नेपाल^१ धंगु नां जूगु खः धका ब्वनिर्णित भंगः लायेत संगु खः । वयकलं थःगु सुबिधाया निरिति मेथाय् नेया थासय् 'नेमि' प्रयोग यागु खः ।^२ थ्व जुल ह्लापाया मनूया खँ । थौंकन्हैया वैज्ञानिक युगया विद्वान प्राध्यापक सिलव्यां लेवीं 'पन्च' शब्दं 'पांचाल' शब्द जूगु दसु कयना फेदीयात धाइगु 'नीप' शब्दं 'नेपाल' शब्द जूगु खँ धका धयादीगु दु ।^३ तर 'पञ्च' शब्दय् 'आल' प्रत्यय स्वाना 'पञ्चाल' जुइफु ! 'नीप' शब्दय् व प्रत्यय स्वाना 'नेपाल' जुइगु नियम संस्कृत व्याकरणय् मडु । थ्व तद्धित प्रत्यय स्वात धायेवं मू शब्दया ह्लापांगु स्वर वृद्धि जुइमागुलि 'नेपाल' जुइफु नेपाल मखु । थ्वजोजु तर्क मेपिसं नं यागु दु । आः अजोगु तर्क तोता लोगु बिचाः याये मालाच्चंगु दु ।

नेपाल व नेवार शब्दय् आपालं जोलागु खना डाक्टर टामस यंगं छुं छगू मू शब्द विकास जुया थुपि निगू शब्द दत जुइ धका बिचाःयागु व सर जार्ज ग्रियसनं थ्व खँयात समर्थन यागु खः ।^४ तर प्राध्यापक टर्नर

१. ने नाम्ना मुनिना पूर्व पालनात्पुण्यकर्मणा ।

इदं हि हिमवत्कुशौ नेपाल इति चोच्यते ॥ Le Nepal, Vol II. P. 67.

२. नेमे त्वमस्य क्षेत्रस्य मुनीग्रणी भव । (उद्धृत पशुपतिपुराण)

३. Sylvan Le'vi-Le Nepal Vol II. P. 66.

४. Linguistic Survey of India, Vol. III. Part I P. 213.

भाजुं थ्व खँयागु खण्डन याना 'नेपाल' शब्द विकास जुया 'नेवार' जूगु खः धका थःगु प्रसिद्ध नेपाली अंग्रेजी कोषय् च्वयादीगु दु । परन्तु शब्द विकासया नियमयात बांलाक विचार यात धाःसा न नेपाल शब्दं नेवार शब्द जुइफै, न नेवार शब्दं नेपाल हे । थ्व विषये यंग व प्रियर्सनका निरूपण ठीक थें च्वं । तर छु शब्द विकास जुया थुपि निगू शब्द दत धका बिचाः यायेत मुर्मी वा तामांग भाय्या न्यार्वा शब्द पाखे ध्यान बीमा । न्यार्वा धँगु तामांगतय् छगू थर खः । इमिगु धापू कथं नेवाः व तामांगया हि ल्वाकज्याना न्यार्वा जूगु खः ।^५

नेपाल शब्दया दकसिवे लिपा 'ल' कार व नेवार शब्दया लिपा 'र' कार दु । थुपि निगुली ह्लापांगु गुगु खः धका बिचाः यायेत थुपि निगू शब्द दकसिवे ह्लापां गुगु गन छयला तःगु दु, बिचाः यायेमा । नेपाल शब्दया प्रयोग उत्तर भारतवर्षया ह्लापांह्य मौर्य जुजु चन्द्रगुप्त [इ. सं. प. ३२१-२९७] या मंत्री कौटिल्यं दयेकूगु अर्थशास्त्रय् खनेदु ।^६ उकी नेपालं पाटलिपुत्रय् [थौकन्हैया पटना] वनीगु 'भिङ्गिसी' नांया लाढीया बयान बिया तःगु दु । थुगु इलय् बिहारय् चलेजुया च्वंगु मागधी भाषाय् 'र' कारया उच्चारण मजू । वया थासय् न्हावलें 'ल' कार छयलीगु । जुजु अशोकं नापं [इ. सं. प. २७४-२३७] थःगु शिलालेखय् थःगु पदबि 'राजा' या थासय् 'लाजा' च्वयातःगु दु ।^७ उकि स्थानीय नेवार शब्द पाटलिपुत्रय् 'नेपाल' धाइगु व थुकियात हे कौटिल्यं संस्कृत भाषाय् कागु खनेदु । संस्कृत भाय् खल्हा-बल्हाय् मछ्योगुलि उकी विकास जुइगु शक्ति मदु । उगु भाषाय् च्वंगु थ्व वैगुण देशवाशी जुया थ्व शब्द उगु बखतनिसें चले जुया वया च्वन ।

5. A Narba is the progeny of intercourse between a Murmi and a Newar. The Narba has the highest social standing amongst the Atharajatt, and ranks nearly equal to the Barathamang. (Vansitarth: Gurkhas, P. 142)

६. कौटिल्य-अष्टप्लोतिसङ्घात्या कृष्णा भिङ्गिसी ।

वर्षयारणमपसारक इति नैपालकम् ॥ (कौटिल्यः अर्थशास्त्र, २ अधि ११ अध्याय ३० प्रकरण)

७. अशोकया शिलालेख

अभाष्यवंश, नेवार शब्द ह्लापा ह्लापा छ्यलातःगु खने मदु ।
 किच्यागूगु शताब्दी नेपालय् वपि यूरोपवासीतसें च्वंगु नेपाःया वृत्तान्तय् थ्व
 शब्द ह्लापां छ्यलातःगु खनेदु । तर नेवार व नेवार शब्दया दथुइ च्वंगु छगः
 आखः जक पाना च्वंगु दु । म्हुतुया छगू हे अवयवं ल्हाइगु ह्लापांगु आखः
 थाकुगु व्यञ्जन व लिपाया कोमल व्यञ्जन खः । अपु पाखे लीगु मनूतय्गु
 स्वभाव हे, तर 'प' छकोलं 'ब' मजुसे छभा 'ब' जूगु अनुमान दु । अर्थात्
 नेवारं नेवार अले नेवारं नेवार जुइगु स्वाभाविक खः । थ्व क्रम न्यार्बा शब्दय्
 खनेदु । थुकी आतक नं 'ब' 'व' मज्जनि । थ्व शब्द ज्याबले सँय् भाय्या 'पा'
 प्रत्ययया प्रभाव लागु खनेदु । मुर्मोतसें संय् लामापिनिगु पाखें बौद्ध धर्मया
 शिक्षा कागुलि गुरुया भाय्या प्रभाव लाइगु स्वाभाविक हे खः ।

नेवार शब्दया व्युत्पत्ति वा खास अर्थ छु ? धेंगु न्ह्यसः वयेफु ।
 थ्व बारे छगू दृष्टान्त बीगु उचित जू । मघैया ग्वाः व मगही भाय् धका जोलि-
 जोगु निगू विशेषण शब्द छ्यलेगु या । थुपि निगुलि मगध शब्द विकास जुया
 दुगु खः धायेफु; तर थ्व मगध शब्दया अर्थ व व्युत्पत्ति धायेमफु । थ्व हे हाल
 नेवार शब्दया खः ।

२. नेपाल शब्दया सामान्य व व्यापक अर्थ

बागमती खुसिया फुसय् च्वंगु १६ × २० माइल ताहागु गाः
 परापूर्वकालनिते नेपाःया केन्द्रस्थल जुया वयाच्वंगु दु । थनया हे पुलांगु गांचात
 विकास जुजु थौंक्हेया यल, ये व ख्वप दे जूगु खः । उकि नेवार जातिया
 मूछे प्राचीन नेपाः थ्व हे गालय् जःखः तक लिकुना च्वंगु खनेदु । भगवान
 बुद्ध [इ सं. प. ५६३-४८३] या अन्तिम इलय् कपिलवस्तु विध्वंस जुसेलि
 बिस्वंबया शरणार्थी जुया वपि थः देमितय्त नापलायेत वसपोलया मूशिष्य
 आनन्द भिक्षु थ्व हे मालय् बिज्यागु जुल ।^८ चन्द्रगुप्त मौर्यया इलय् अनिकालं

८. हाम्रा भाषामा (खय् भासय्-ही.) घरका नाममा 'आल' प्रत्यय जोडिन्छ
 जस्तो डोटखाल, खनाल । यसै अर्थमा भोटिया भाषासा 'पा' प्रत्यय
 जोडिने गरेको देखिन्छ, जस्तो स्यार (पूर्व)मा रहने स्यार्पा, दुक् (बिजुली
 देश अर्थात् धर्मा) मा रहने दुक् (पा?-ही.) इत्यादि

9. Le Nepal, Vol III P. 183

सतेयागुलि जैन महात्मा भद्रबाहु नं थन हे वया छुं दें चवनाः बिज्यागु खः ।^{१०}
 अशोकया निर्वाण लिपा थ्व हे व्यासी [गालय्] बौद्ध धर्मया चैत्य [चीबहाः]
 व बहाः दयेकल । लिच्छवी जुजुपिसं थन हे देगः थापना यात । थन हे
 राजधानी याना लिच्छवी, बैस, मल्ल जुजुपिसं तातापाक तकं शासन यात ।
 उर्कि नेपाःमितय् सांस्कृतिक स्मारक व्याक्कं गालय् हे आपालं लावन ।
 उर्कि साधारण व्यवहारय् नेपाः धका थ्व हे गाःयात काङ्गु चलन । तर थ्व
 थासय् च्वंगु राजधानीं शासन याक्को प्रदेशयात नापं स्वाका व्यापक अर्थय्
 नेपाल शब्द व्यवहार या । विदेशीतसें च्वेया साधारण अर्थय् थ्व शब्दयात गनं
 छ्यगु खनेमदु; न्ह्याथाय् नं व्यापक अर्थय् छ्यलातःगु खनेदु । अय्सां नेपाः
 दुने साधारण अर्थय् नं छ्यलेगु चलन दुगुलि थ्व भेद सीमदयेकेत थ्व केन्द्र
 स्थलया गाःयात नेपाः गाः वा नेपाल उपत्यका धायेगु चलन जूगु दु ।

नेपारतय्गु बखतय् व्यापक रूपय् नेपाल शब्दं गन तकया
 प्रदेशयात ज्वं जुइ धका ठेकान याना धाये थाकु । बुद्धया इलय् थ्व नेपाःया
 जलाखलाय् दखिन पाखे [यिता] वृजि व मल्लतय्गु प्रजातन्त्र शासन दुगुलि
 ह्लापां ह्लापां नेपारत नं प्रजातन्त्रया रूपय् च्वना च्वंगु जुइ धका कोछीफु ।
 शिशुनागवंशी जुजु अजातशत्रुं [इ. सं. प. ४६१-४५६] थुपि निगुलि प्रजातन्त्र-
 यात कोथला थःगु साम्राज्यय् दुकासेलि नेपारतय् नं राजतन्त्र जुइगु स्वाभाविक
 खः । क्रिप्यंगूगु शताब्दीया आखिरपाखे च्वयातःगु छगू वंशावलीयागु ग्रियर्सनं
 साप हे तारीफ यागु दु ।^{११} थ्व सफू नेपाःया सरकारी सफूकुथी 'गोपालराज
 वंशावली' नां जुया च्वंगु दु । थुकी लिच्छवित वया राज याये न्ह्योयापि ३२
 ह्य किरात जुजु पिनिगु नां बियातःगु दु । इपि नेपार जातिया जुजुपि खः ।
 भारतवर्षया पूर्वोत्तर प्रदेशय् च्वंपि आग्नेय देशी जनताया संस्कृत भाषाय्
 किरात धायेगु चलन दु । उर्कि नेपाःया नेपारत नं आग्नेयदेशी गतिया

10. Le Nepal Vol. II P. 65

11. L. S. I Vol. III Part I P. 214

ईसवी संबतबे निगू शताब्दी न्ह्योनिसें चवगु महाभारतय नेपाःया नां महुगु छगू अनौठागु खँ खः ।^{१३} थ्व लेख नेपाःया किरातराज्यया अन्तिम शताब्दी पाखेयागु खः । थुकी नेपाःया नां मव्यूसा नं दिग्विजयपर्वय भीमसेन पूर्व पाखे वया विदेह देशय च्वना ऐन्द्रपर्वत सत्तिकं ह्यह्य किरातया अधिपतितयत् त्याकल धका च्वयातःगु दु ।^{१४} थ्व खँ सत्य धका हे धाये फैमखु । अय्सां थुकि ग्रन्थ चवगु ईया अवस्था सीके आवश्यक जूव । थुगु विदेहय थौकन्हेया दरभङ्गा, महोत्तरी व सप्तरीया जिल्ला ला । अन पर्वत धाये लोगु पहाड महाभारतया सिधुलिगढीया गुँ खः । नेपाःया केन्द्रस्थलं ईया विदेह पाखे वनेगु मू लँ थ्व हे गुँ वंगु खनेदु । उगु इलय थ्वया जःखः चिचीधं-चागु न्हयगू किरात राज्य दुगु सीदु । उकी मध्ये छगू अवश्य नं नेपाःया राज्य हे जुइ, मेगु तराईया थारूतयगु राज्य जुइ । त्यंगु न्यागू राज्य पहाड खण्डया थामि, खम्बू आदिया जुइ । थ्व लेखं थ्व शताब्दीतकं नेपारया राज्यया पूर्व व पश्चिम पाखे नापं आपालं चिचीधंचागु किरात राज्य दुगु सीदु । इसवी संबतया ह्लापांगु शताब्दी लिच्छवितसें नेपारतयत् चीका ह्लापांगु आर्य राज्य खडा

१२. संस्कृतया किरांत शब्द व भीगु भाषाया (खय् भाय्-ही.) किरांत शब्दया अर्थय आपालं पा । मकवानी सेन जुजुपिसं भिन्यागूगु शताब्दी मगःतयगु बस्तीथात 'मगरांत' धका नां छुत । थुमिसं भिखुगूगु शताब्दी दुधकोसीं पूर्वया पहाड प्रदेश व सप्तरी, मोरङ्गया तराई नं त्याकल । दुधकोसीं पूर्वया मनूत किरात हे खः । तराईया बाशीतसें थुमित हेस्याना 'किरूवा' धाइगु । थ्व हे किरूवा शब्द मकवानीतसें मगरांत धाये थें 'किरात' धका इमिगु थाय्या नां छुत । उकि किरात धेंगु थाय्या नां जगु व किरात धेंगु जातिया वंशया नां जूगुलिं थ्व अन्तर तयेमा । सारांश थ्व खः कि किरांतया मनूत किरांति जक किरात मखु । थ्व भेद मथूगुलिं नेपाःया किरांत जुजु धौंपि किरांती हे खः धेंगु छह्य वंशावली च्वमियात लगे जुल । स्वयादिसं Wright's History of Nepal P. 109

१३. कर्णादिग्विजयपर्वे नेपाःया नां लागु दुसां अनुक्रमणिकाध्याये थ्व पर्वय च्वया मतःगुलिं लिपाया क्षेपक थें च्वं ।

१४. सभापर्व अध्याय ३१, इलोक १५ (निर्णयसागर)

यासेलि प्यंगुगु शताब्दी थुपि ब्याक्क किरात राज्य ह्ना नेपाःया दुने छपांय् जूगु खनेदु ।

लिच्छवितयगु ईःया नेपाःया लागा प्रष्ट उल्लेख जुयाच्चंगु लेख गनं मदु । गुप्त सम्राट समुद्रगुप्तया इ. सं. ३५० पाखेयागु प्रयागय् च्वंगु अभिलेखय् कामरूप [आसाम] व कर्तृपुरया [कुमाउं] दथुइ नेपाः तयातःगु दु ।^{1५} कामरूप व नेपाःया दथुया प्राकृतिक सीमान्त टिस्ता खुसि खनेदु । तर थुखे पाखे अनुमानया जक भर । नेपाःया प्रतापी जुजु मानदेव [४६४-४६९] यागु चंगुया शिलालेखय् वय्कलं गण्डकी छिना विद्रोही जुजुयात बुका मल्लपुरी त्याकूगु बयान दु ।¹⁶ उगु बखतय् काली खुसिया सिथय् पर्वते मल्लतयगु शासन थापित मज्जिनुलि थ्व मल्लपुरी कर्णाली खुसिया ब्यासी च्वंगु खनेदु । न्हयगूगु शताब्दीया पूर्वाद्धय् नेपालय् धह्य प्रसिद्ध चिनिया लेंजुवा युआनच्वांगं थ गु भ्रमण वृत्तान्तय् नेपाःया घेरा ४००० ली दु धयातःगु दु ।¹⁷ ३ लीया १ माइलया त्याखं थ्व घेरा १३३३ माइल जूव । थ्व त्याखं^{1८} उगु ईःया नेपाः हानि टिस्तानिसें सखिकालेक अर्थात् इलामनिसें प्यूठानतक न्यनाच्चंगु खने दु । गुंगूगु शताब्दीया शुरूइ काश्मीरया जुजु जयाधीडं नेपालय् हताः बबले नेपाःया जुजु वर्मदेव काली गण्डकी उखेया छगू तःधंगु खुसिया सिथय् च्वना त्वागु खः ।^{1९} थ्व तःधंगु खुसि भेरी वा कर्णाली जुइफु । तर इ. सं. ८८० स लिच्छवि राज्य फुना बैस राज्य जुसेलि नेपाः राज्यया अवनति शुरू जुल । ५०० दं थ्व राज्य कायम जूवले सीमानाय् उत्तर पाखे संदेशं त्यला हयाच्चंगु व सिंगलिलां पूर्वया पहाडखण्ड नेपालं तोपयूगु थें च्वं । पश्चिम पाखेया मल्ल राज्य बिलकुल स्वतन्त्र जुइ धुंकूगु जुल । दक्षिण पाखे नं सिमरोनगडया कर्णाट जुजुपिसं पूर्व पाखेया तराई दखल याना न्हगु राज्य स्वन । थौकन्हेया बुटवलया तराई पश्चिमया मल्ल जुजुपिसं काये धुंकूगु जुल । अयनं सिंगलिलानिसें सखिकालेक तकया पहाडखण्ड नेपालय् दुने लानाच्चंगु खनेदु ।

15. Gupta Inscriptions (Fleet), P. 8

16. Le Nepal, Vol. III P. 14

17. Bill Buddhist Records of the western world Vol II P. 80

18. Chambers Dictionary

१६. राजतरंगिणी अध्याय ४, ५३०-५४५

बैस राज्य न्हने छगू शताब्दी न्ह्योनिसें लाय्कूया थवथःया त्वापु व परचक्रोया आक्रमणं तज्याये धुंकूगु खः । इ. सं. १३८० स अन्तिम बैस जुजु अर्जुनदेव वा अर्जुनमल्लयात लिक्का वयकःया मन्त्रीतसें स्थितिमल्ल नांयाह्य छह्य राजपूतयात राजसिंहासनय् तःगु जुल । अले व नेपाः राज्य कदला २०० दैया दुने काठमाडौं, गोर्खा लमजुंग, तनहुं, मकवानपुर आदि थ्यंमथ्यं ३० गू राज्य दवन । अयनं त्रिशुलीनिसें तामाकोसीतक महाभारतया उत्तर पाखे चवंगु येँ, यल, खप व दोलखाया प्यंगू राज्यया जुजुपिसं थःगु शासन क्षेत्रयात नेपाः धया हे चवन । उकिं नेपाल महात्मे थ्व हे भागयात नेपाः धयातःगु दु । तर लिपा दोलखाया जुजुपिसं थःपित नेपालाधिपति मधासे दोलखाधिपति^{२०} धासेंलि नेपाःया सीमाना भन कयकुना पूर्व सीमाना मुनकोसी जुज । येँ, यल व खपया मल्ल जुजुपिसं जक लिपातकं थःपित नेपाःया जुजु धया चवन । गोरखा, पाल्पा, मकवानपुर आदिया जुजुपिसं थःगु राज्ययात नेपालं पिने भाःपीगु ।

गोरखाया श्री ५ बडामहाराज पृथ्वीनारायण शाहं इ. सं. १७६९ स वर्तमान नेपाः राज्यया नी स्वना येँ यात राजधानी याना नेपाःयात हानं छपाय् यायेगु स्वसेनिसें नेपाःया बिस्तार जोडतोडं बढे जुया हानं १७९२ तके पूर्व पाखे टिस्ता खुसि तक पश्चिम पाखे अलकनन्दा खुसि तकया लागा नेपाः धाल । इ. सं. १८०५ स पश्चिमपाखे सतलज तक नेपाःया लागा थ्यन । उकिं इ. सं. १८११ स छापेजगू अंग्रेजी विश्वकोषय् बियातःगु बैकिपाय् [मानचित्र] मुखीम, कुमाउँ गढवाल व सिमला जिल्ला नापं नेपाः दुने थ्याकातःगु दु । इ. सं. १८१६ स थ्व नेपाःया लागा कयकुना पश्चिम पाखे महाकाली खुसि व पूर्व पाखे सिगलिला पहाड व मेची खुसि कायम जुल । थौंकन्हेया नेपाःया अर्थ थ्व हे सीमाना दुनेलागु भूभाग जूगु दु । थ्वहे भूभागया मनूतय्त नेपाली धाइ । थ्व हे भूभागय् रोष्ट्र भाषा जुयाचवंगु खस कुरा वा परवतिया बोली 'नेपाली' धायेगु यात ।

खःजा नेपार जातिया नामं नेपाल शब्द दत । तर ताहाःगु ईःया फेरं व नेपार जातिनाप नेपाल शब्दया सम्बन्ध बिलकुल त्वादले धुंकल । वया भाय् लिसे थौंकन्हेया नेपाली भाषाया सम्बन्ध मडु । नेपार शब्दं नेवार शब्द दुगु जूसां नं नेपार गुहालिसे थौंकन्हेया नेवाः तय्गु

२०. स्वयादिसें येँया म्युजिमय् चवंगु वहःया तके — 'दोलखाधिपति श्री श्री जयेन्द्रसिंहदेवस्य पट्ट महादेवी स्त्री विजयलक्ष्मी महादेव्या'

खालि भाषाया सम्बन्ध जक खनेदु; अर्थात् नेपार जातिया भाषा विकास जुया थौंकन्हेया नेवाः भाय् दुगु थें च्वं । परन्तु नेपारतय् वंशधर थौंकन्हेया नेवाःत खः धका कदापि धाये फेमखु । अथे जूसां नेवाः भाय् ल्हाईपित हे नेवाः धायेगु परिभाषा दया च्वंगुलि व मेगु विक्षेप परिभाषा मदुगु नेपारया वंशधर नेवाः खः धैथें च्वनी । थ्व भ्रम तंकेत नेवाः भाय्या परिचय थन बोगु आवश्यक खना ।

३. नेवाः भाय्

नेपाःया पहाडखण्डय् च्वंपि याकथुम्बा, खम्बु, सुनुवार, थामि, मुमि आदिया भाय् थें हे नेवाः भाय् नं बर्मा [तिब्बर्मी] परिकारया भाय् खः धका भाषाविज्ञानीतसैं निर्णय यागु दु ।^{२१} खः नं थुपि व्याक्क भाय्या संस्कृत, हिन्दी, नेपाली आदि भारतीय आर्य भाषाया बोलीलिसे छुं छुं प्रकारया सम्बन्ध मदु । खः जा नेपाली भाषाय् अरबी, फारसी व अंग्रेजीया शब्द दुथ्याथें नेवाः भाषाय् नं भारतीय आर्य भाषाया व सँय् भाय्या आपालं शब्द दुहां वया च्वंगु दु । तर ल्याःया शब्द व क्रियापदया आर्य भाषालिसे छुं सम्बन्ध मदु । शब्दकोष व व्याकरणया नियम नं ब्यागः । ग्रियर्सनया धापू कथं थुपि व्याक्क भाय् सँय् भाय्या कचामचात खः । तर सँय् भाय्लिसे नेवाः भाय्या उलि हे अन्तर दु, गुलि याकथुम्बा आदिया भाय्लिसे ।

हिमालयया थुपि अनार्य भाय् निगू समुदायले इनाच्चंगु दु । गुगु भासय् नां नापं व क्रियापद नापं सर्वनाम स्वाये ज्यू, छगू सर्वनामिक समुदायले व मेगु असर्वनामिक समुदायले । गथे याकथुम्बा [तमोर खु] या भाषाय् — “छह्म मनुया निह्म काय् दु” धायेत “लोच्छा यामि थिक्-ले नेच्छी कु-सा वीयी-छी” धायेमा । थुको लोच्छा = सुं, यामि = मनु, थिक्-ले = छह्म-याके, नेच्छी = निह्म, कु-सा = वया मचात, वीयीछी = दु-ईपि । थन नां व क्रियापदय् नापं सर्वनाम शब्द ‘कु’ व ‘छी’ क्रमशः स्वानातःगु दु । थ्व हे खँपुयात खम्बुया छगू भासं “निक्-पु मिन्-पो सक्-पु यु-चुमो” धाइ । थन निक्-पु = छह्म, मिन् पो = मनुया, सक्-पु = निह्म, यु-चु = वया काय्पि, मो =

२१. L. S. I. Vol. Part I स थ्व निर्णय व उदाहरण स्मेत बिया-तःगु दु — स्वया दिसँ — पृ. १६६

दु । थन नाम शब्दय् जक 'यु' स्वानातःगु दु । थ्व हे खँपुयात नेवाः भासं थथे धाई- "छम्ह म्नुया निह्य काय दु ।" थन नाम व क्रियापद नाप सार्वनाम स्वानातःगु मदु । तर संख्यावाचक शब्दनाप नेपाली भाषाय् आवश्यक जीवधारी-यात धाइगु 'ह्य' शब्द मागुलि स्वानातःगु दु । 'दु' थ्व क्रियापद वर्तमान कालय् नं छय ।

सनातन धर्म कयातःपि मगः व बौद्ध धर्म कापि गुरूंग, मुर्मि व स्यार्पाया तथा निगुलि धर्म माने याईपि नेवाःतय् भाय् असार्वनामिक खः । थुपि निगुलि धर्म मज्जपि याकथुम्बा, खम्बु, धिमाल, थामि, हाय्, चेपांग आदिया भाय् सार्वनामिक खः । इ.सं. १८२६ निसं सुनुवारतसं सनातन धर्म ज्वनेगु यात । उगु हे भा श्री हजसनं इमिगु भाय् जाँचेयाबले सार्वनामिक खंगु खः । परन्तु ५० वं लिपा प्रियर्सनं जाँच याबले असार्वनामिक खन ।^{२२} थुलि ह्यो ईःया दुने खँपु ज्यायेगु पहःहिला सार्वनामिकं असार्वनामिक जूगुया कारण धर्म गुरू जूपि असार्वनामिक नेपाली भाय् ल्हाइपि ब्रम्हूतय्गु सहवासं हे मगःतय्गु भाय् नं सार्वनामिकं असार्वनामिक जूगु थें च्वं । सँय् भाय् नं असार्वनामिक खः । थ्व हे सँय् गुरुपनिगु सहवासं गुरुङ, मुर्मि व स्यार्पातय्गु भाय् असार्वनामिक जूगु अनुमान या । विहारया पहाडी प्रदेशय् च्वपि संथाल आदिया मुण्डा भाय् नं सार्वनामिक खः । थुमित भाषाविज्ञानीतसं आग्नेय देशी भाषा परिवारया कचाय् दुथ्याका तःगु दु । नेपाःया पूर्व तराई पाखे च्वपि सतारतसं नं संथालतय्गु भाय्लिसे जोलागु भाय् ल्हाइगु । उकिं नेपाःया थौंकन्हेया सार्वनामिक भाय्यात नं आग्नेया देशी परिवारय् दुथ्याकेगु उचित जुइ ।^{२३} आग्नेय देशी भाय् ल्याइपि जातितय् संस्कृत भाषां किरांत धाइ धँगु खँ च्वे हे च्वये धुन । मगः आदिया भाय् नं न्हापा सार्वनामिक खनेदुगुलि थुपि ब्याक्कं किरांतय् दुथ्या । थुगु ल्याखं नेपारतय् भाय् नं थथे हे आग्नेय देशी जूगुलि किरात धागु खः धँगु अनुमान यागु खः ।

नेपारतय् भाय्या नमुना गनं खने मदुसां नेपाःगालय् च्वंगु लिच्छवि जुजुपिनिगु संस्कृत भासं च्वयातःगु शिलापत्रय् दुगु असंस्कृत शब्द नेपारतय्गु भाय्या शब्द खः धँगुली छुं सन्देह मदु । उगु असंस्कृत शब्द संज्ञावाचक खः ।

22. L.S. I. Vol. III, Part I.P. 199- Sunwari

23. Northe and Morris-The Gurkhas, pp 66

नमूनाया निर्ति छापे जुइ धुंकूगु व मज्जनिगु शिलापत्रं छुं नां थन ल्हया —

क) ग्वलय् च्वंगु रत्नसंघया छापे मज्जनिगु शिलापत्रय् गांया नां दुलङ्ग, खेपुङ्ग, दुं प्रङ्ग, ह्यास्प्रङ्ग, खेनम् ।

(ख) खपया तुलाछे त्वाःया शिवदेवया छापे जुइ धुंकूगु शिलापत्रय् गांया नां—खूपुङ्ग । ^{२४}

(ग) यलया तइयाः त्वाःया जिष्णुगुप्तया छापे जुइ धुंकूगु शिलापत्रय् ^{२५} गांया नां—थम्बू, गांगूल, असिङ्खा, कडप्रिङ्ग, कंकुलङ्ग ।

(घ) सतुंगःया शिवदेवया छापेमज्जनिगु शिलापत्रय् गांया नां—काटुङ्ग, फिरङ्ग जगातया नां—कट्टारक, कुधुठ्ठर ।

(ङ) यलया नरेन्द्रदेवया छापेमज्जनिगु शिलापत्रय् करया नां—भटा, माप्चोका, पीटाल्जा ।

नेपार जातिया राज्य न्हंगु प्यसः, न्यासःइं लिपाया शिलापत्रय् वगु थ्व संज्ञावाचक नां थपाय्सकं कणकटु धासेलि न्हापाया ला भन हे कणकटु जुइ । थौंकन्हेया सार्वनामिक भाय्या खँग्वः नं कर्णकटु जू । कर्णकटु जुइगुनं सार्वनामिकया लक्षण खनेदु । असार्वनामिक जुयावं वसेलि कर्णकटुता (छापहः) तना श्रुतिमधुरता (नायुपहः) जुइगु नियम खनेदु । भारतीय आर्य भाषाया प्रभावं थौंकन्हेया नेवाःभाय् थपाय्सकं न्यनेयइपु कि उलि नेपाली भाषा (खय् भाय्) नं मज्ज । थ्व दृष्टान्तं थ्व सीदत कि नेवाः भाय् थौंकन्हे असार्वनामिक जूसां नं न्हापा न्हापा सार्वनामिक खः व भाय् ल्हाइपिं मनूत किरात खः ।

४. थौंकन्हेया नेवाःतय्गु नस्ल (Race) व वृत्तान्त

नस्ल ह्यसीकेगु न्हापांगु कस खः मनूतय्गु ह्यया बनावट । आर्य नस्लया लक्षणय् ऊन तुयू वा तुयू तुयू धाइगु म्हथिक् तःथिक् ताहाः व च्वामु न्हाय्, चाक ग्वाय्, तइयागु कपाः ततग्वगु मिखा मुख्य खः । कश्मीर व पञ्जाबया आर्यतय्के थौंकन्हे नं थ्व लक्षण अपो खनेदु । तर पूर्व पाखे वसेलि हावापानी व बासस्थ-

24. Le Nepal, Vol III, pp. 63-64 भक्तपुरयागु नां थ्व हे शब्दं दुगु खः ।

25. Indian Antiquary V.IX, pp. 171-72

लया प्रभावं व अनार्य नस्लया हि त्वाकज्यागुलिं श्व लक्षण म्हो जुया वयाचवंगु
 दु । आनेय देशी नस्लया रङ्गरूप देश स्वया पाना वं । हिमालयया आनेयदेशी
 किराततय्गु रङ्गरूप मंगोलक जुइ अर्थात् पतिविं न्हाय्, न्यताः क्वे छ्वां वःगु,
 पार्चाछिगु स्वाःपा, चाक ग्वाय् म्हो व लप्तेकुसां (धुस) कुयातःगु थें जोगु मिखा
 जुइ । तर नेपालय् च्वं पि किरात जातय् गुहसिके श्व लक्षण पूरा व, गुम्हसिके
 भचा म्हो जु । निगूगु कस खः भाय् । आर्य भाषा ल्हाइ पि आर्य व किरात भाय्
 ल्हाइ पि किरात नस्ल या । तर गनं गनं छगू नस्लया मनुखं थःगु भाय् लोमंका
 जःखः च्वं पि मेगु नस्लया भाय् कापि नं दु । श्वया नमूना तराईया थारुत खः ।
 थुमिगु रङ्गरूप मंगोलक खः, तर भाय् भारतीय आर्य भाषा ल्हाइगु । भारतीय
 आर्य ब्रम्ह, क्षत्री आदि जातया भेद दु । तर थारुतय् श्व भेद मदु । उकिं थुपि
 किरातय् हे ल्याः खाई, आर्य भाषां खं ल्हासां ।

नेपाःया किराततय् भासं जात सीदु । छगू हे भाय् ल्हाइ पि मनुख्य
 नय त्वने व विधिव्यवहार चलेजू । मगःत व्याक्क उर्थे हे । गुरुङतय् प्यंगू जात
 व भिखुगू जात धका भेद यासां थुकिं विशेष भेदभाव मत । मुमितय् भिनिगू
 थर व भिच्यागू जातया भेदभाव थौंकन्हेयागु खः । श्व हे तालं मुनुवारतय्
 भिगू थर व भिनिगू थर खः । मेगु किरात जात थामि, हायू, चेपांग, बरामू,
 धिमाल आदि नं मगःतय् थें हे एकता दु । याकथुम्बा व खम्बुतय् भाय् पा । भाय्
 कथं जात पासां व्याक्क खम्बु व याकथुम्बात मिले जुया थयंथः नये त्वने व व्य-
 वहार चले याना च्वन । तर किरात भाय् सांभाय् जूसां नेवाःतय् भारतीय आर्य
 थें हे जातपात थीत्यो मत्थोया भेदभाव दु । थुमिगु रङ्गरूप (ऊनय्) आर्य
 नस्लया लक्षण दु । उकिं थुपि किरात वर्गया मखु धका निश्चय यायेफु । श्व
 आर्य नस्लया मनूत गथे नेपाःया केन्द्रस्थलय् वया थःगु भाय् तोता नेवाःभाय्
 ज्वना नेवाःजुल धका क्यनेत नेपाःया इतिहासया छगू भागया छुं भचा संक्षेप
 थन बीमाला च्वन ।

इ. सं. प. या निगूगु शताब्दी अशोकं छव्याहःपि प्रचारकत नेपाःया
 केन्द्रस्थलय् वया नेपारतय्त बौद्ध धर्मया शिक्षा बिल । श्व ख्वाउँगु पहाड प्रदे-
 शय् विहार वा उत्तर प्रदेशया तापलय् च्वं पि ज्याथ जियथित वया च्वने थाकुइ-
 गुलि ल्यायह्य ल्यासेपि भिक्षु भिक्षुनी वया धर्म प्रचार याना नेपाय् त्वाक
 ज्याज्यां आर्य हियात त्वाकवाक यात । श्व सिलसिला लगातार जुयावं च्वन ।

नेपारतसें नेवार जुया सभ्य व सुरूप जुया बुज्या, शिल्प आदि उन्नति ला यात, तर बौद्धधर्म त्वायेगु बल खाउंका ब्यूगुलि छगूगु शताब्दीया दथुइ विहारं लिच्छवित वया इमिगु राज्य लाकाकाल । थुपि लिच्छवितसें च्यासः दें राज्य याबले नेवाःतय्गु दे छगू छगू यायां त्यला थुमित बिसिक छवत । बिस्युं वपि नेवाःत जःखः च्वपि मुर्तितलिसे त्वाकज्याना न्यार्वा जुल । नेपाःगालय् हे च्वना च्वपि पहरी [पइ—हो.] धायेका दुःख सिया च्वंचवन । इपि थौंकहे साप हे म्हो । आः निसःस्वसः दँया दुने थुपि न्हावनीगु संभावना दु । बौद्ध धर्म माने याना च्वन । तर चीमि जूगुलि गुभाजु पुरोहित मदया धर्म कर्म नं याये मफु । नेवाःभाय् हे ल्हाइगु । ग्रियर्सन भाजु थुमिगु भाय् नेवाःभाय् मखु धागु दु । तर थ्व द्वं खः । वयकलं दोलखाया नेवाःभाय्या नमुना खंगुजसा थथे द्वंकी मखुगु ।

लिच्छवितयत् उत्तरप्रदेशया ब्रम्हूतसें भ्रष्ट क्षत्री धाइगु । ^{२६} तर थुमिसं थःत गङ्गाति हे पवित्र भापीगु । ^{२७} थुपि सनातन धर्म माने याइपि जूगुलि थुपि नापं ब्रम्हू, बज्जा, ज्यापु, शिल्पकार, डुम, दुसाद आदि व्याक्क जात वःगु जुल । थुपि नाप बिहावारी यायां लिपा लिपा नं उत्तरप्रदेश व विहारं थोचा थोचा मनूत वयावं च्वन । तथो छ्कोलं मवसे चिची थोचा मुना वैगुलि याना छगू निगू पुस्तां हे थःगु भाय् लोमंका नेवाःभाय् काल । गुंगूगु शताब्दीया आरम्भय् विहारं बौद्ध धर्मया बावबले व्याक्क लिच्छवित बौद्ध जुया छगू जात जुल । बिहारं थारु जातिया कुम्हा, धोब्या व थथे हे मेमेपि शिल्पकारत नं थन वक्को लिच्छवि जुया छगू जात जुल । डुम व दुसाद क्रमशः पो व च्यामखल धायेका च्वन । गुंगूगु शताब्दीया अन्त्ये उत्तर प्रदेश बैसत वया थुपि लिच्छवितयत् त्याका न्हूगु राज्यया नी स्वन । थुपि न्हू वःपि बैसतसें लिच्छवितयत् राज काजया छुं ज्या मव्यसे कृषक अथवा ज्यापु याना बिल । ^{२८} बमलागुलि याना लिच्छविया रुपान्तर लाछी शब्द काथरया अर्थय् प्रयोग जुल । लिच्छवितयत् बाजी (बृजि) नं धा । बैसतसें हेस्याना बनिया नं धायेगु यात ।

बैसतसें थःत सूर्यवंशी क्षत्री धाइगु । मिछ्छगूगु शताब्दीया अन्तय् सिम-

२६. मनुस्मृति, अध्याय १०, श्लोक २२

२७. जयदेव द्वितीयया पशुपतिया सिलालेख, I.A. Vol. IX

२८. येँ, यल हाडिगां आदि थासय् लिच्छवितय्गु शिलापत्र आपा याना ज्यापुत च्वना च्वंगु त्वालय् लुयावःगु दु, मेथाय् म्हो ।

रौनगढ्य् नान्येवं कर्णाट राज्य थापना यागु व थुपि कर्णटत सनातन धर्म माने
याइपि जूगुलि थुमिगू प्रभाव लाना बैस जुजुपि नं लिपातकं सनातन धर्मय्
अटल जुया च्वन । नान्यदेव नाप नेवाःत सिमरौनगढं नेपाः वःगु खः धैगु छगू
दन्त्यकथा चले जुया च्वंगु दु । तर थ्व खःगु खं मखु । निसः व जछि दै कर्णाट
राज्य कायम जूबले नेपालय् बैस जुजुपिसं शासन याना च्वंगु जुल । सीमाना
स्वापि बैस व कर्णाटतय् दथुइ गुबलें मेल, गुबलें त्वापु जुइगु स्वाभाविक खः ।
मेल जूबले कर्णाटतय्गु चालचलन तिसा वसः जक हे मखु कि राज्यया मुख्य मुख्य
कर्मचारीत नापं नेपालय् स्थायी रूपं च्वं वःगु खनेदु । थुपि मध्ये महाजु व कसजु
निगू थर सीदुगु दु । महाजु कर्णाट राजवंशया मंत्रीवर्गयापि व कसजुपि लेखा-
ध्यक्ष (कायस्थ) खः । मन्त्रीत महामात्य वा अमात्य धाइगु । महामात्य शब्दया
रूपान्तर महाठ व्यवहार जुइगु ।

बैसतय्गु न्यासः दैया राज्यइलय् संदेश्य् बौद्ध धर्मया प्रचार तस्सक
जूगुलि अनया लामातसैं नेपाःपाखे वया गुरुङ्ग, स्यार्पा व मुमितय्त बौद्ध धर्मया
देखा बिल । भिनिगू शताब्दिद्या अन्ततक नं बिहारय् बौद्ध धर्म स्वाना च्वंगुलि
अनया भिक्षुपि वया बरामु नांया आग्नेयदेशी जातया छथोयात बौद्ध धर्म बिद्या
बलामि यात । निखेरं बौद्धतसैं त्यगुलि बैस जुजुपिसं थुमित थाय् बी हे भाल ।
थौकन्है येँ व यलय् दनिगु बहाः छगू निगू तोता, मेगु व्याक्क बैस जुजुपिनिगु
पालय् दयेकूगु खनेदु । थ्व बहाः नेपालि संस्कृयाति प्रतीक जुयाच्च्वंगु खः ।
अन च्वंपि भिक्षु वा बरेत दार्शनिक व बैद्य नं जुइगु । बौद्ध दर्शनया व्याख्या
यायेगु व द्बंकेगु नापं याइगुलि थ्व बहालं द्बनेकूया ज्या नं बीगु । वैद्यतसैं वासः
या ज्या नं याइगुलि आरोग्यालयया ज्या नं थ्व हे बहालं बीगु । अन हे द्योपि-
निगु कियो च्वयेगु व द्यो दयेकेगु ज्या नं याइगुलि थ्व शिल्पशाला (ज्यासः) या
रूपय् नं जुल । थन च्वंपि भिक्षु, भिक्षुनीत गृहस्थ जुइत पिहां वया उपासक वा
उराय् जुया च्वनीगु । तर बहालय् दुने भिक्षु, भिक्षुनी नापं च्वनीगुलि व्य-
भिचार नं जु । तर थुइत छुं अपराधया रूपय् ल्याः मख्या । शत्रुलिसैं त्वाय्त
ज्वाब मज्जंसे तंत्रमंत्रय् विश्वास याइगु । थ्व हे थुमिगु नाशया कारण जुल ।
इ. सं. १३४६ स बंगालया आक्रमणकारी पठानतसैं थ्व बहाःध्वस्त यानाबिल ।
थुमिगु विश्वासय् च्वना बैस जुजुपिसं नं त्वाइपि सेना तया मत । उकि थुमि
लाय्कु व देगः व्याक्क भस्म याना आक्रमणकारीत लिहां वन । सनातन धर्मया
देगः जुजुपिसं दयेका बिल । बौद्धतय्के शिल्पकला ल्यं दनिगुलि थुमिसं नं तछ-

यागु चीबहाः व बहाः २०-२५ दँया दुने हे न्हापा थें हे दयेकल । तर चीबहाः व बहाः दसां तंभ्रमंत्रय् मनूतय्गु विश्वास तन । बहाःया अवनति शुरु जुल ।

लिपाया मल्लवंशया संस्थापक जुजु स्थितिमल्ल छम्ह बैस सामन्तया दोलाजि (घर जुवाइँ) जुया लिपा नेपाःया अधिपति जुल । थ्व नं थःत सूर्य-वंशी क्षत्री धाइगु । थ्वय्कःनाप वपि ब्रम्हुत संभवतः सरवरिया खः । बैस मन्त्री वा भारदारतसें स्थितिमल्लयात जुजु यागुलिं थ्वय्कलं मन्त्रि बर्गय् बैसतय्त हे तये माल । थ्वय्कःया काय् ज्योतिर्मल्लं थः प्रजायात वर्णविभाग याना ज्या इना ब्यबले थःगु वंशयात क्षत्री व थः नाप वपि गुरु पुरोहितयात ब्रम्हू बर्गय् तल । थुगु बखतय् ब्याक्क बैसत नेवाः भाय् ल्हाना नेवाः जुइ धुंकूगु जुल । अय्सां क्षत्रीया चिकथं 'सिंह' शब्द थगु नां नाप स्वाइगु । ज्योतिर्मल्लं थुमित क्षत्री मनासे बैश्ये तल । थ्व खँ न्हासं चुया बैसतसे नं येकल । बैसतय् गुरु-पुरोहित ब्रम्हूतय्त छथीयात आचाजु (आचार्य) व मेगु थरीयात जोशी धाइगु । थुमित नं ज्योतिर्मल्लं ब्रम्हूले मथ्याकुसेलि बैश्ये थ्याक वन ।

ज्योतिर्मल्ल व वय्कःया उत्तराधिकारीपिसं उत्तर प्रदेश व बिहार रजपूततय् सचात भिकेयाना ब्याहा यायेगु नियम दयेकल । थः थ्या पाखें दुपि सन्तानयात 'मल्ल' व मथ्यापाखें दुपिसन्तानयात 'सिंह' धायेगु नियम दयेकल । बुलुहुँ बुलुहुँ भारदारय् थुपि नं थ्यावन । थुपि भारदारतसें थवंथःजक ब्याहा-वारी व नये त्वने यागुलिं थुमिगु छगू वर्ग हे दया साधारण बैसयाबे च्वन्हा वन । भारदारय् थ्याके मफुपि बैसतसें बनेज्या याना क्वेया वर्गय् च्वना श्रेष्ठ (संस्कृत श्रेष्ठी, हिन्दी सेठ) धायेगु यात । आचाजु व जोशी नं लायकुली पूजा पाठ याइपि क्वेया वर्गय् व मेपि क्वेया वर्गय् दुहां वन । थ्व चलन मल्लकालया समाप्ती कालतक चले जुयाच्वन । खः जा यें, यल, ख्वप व दोलखा समेत प्यंगु राज्य याना भारदार वर्गय् लापि बैसतयागु थर पिगुलि अपो दत । तर गोर्खाली भारदारय् पांडे, पन्थ आदी खुगू थर दुगुलि थःत नं इमिसं ६ थरी धका धया क्वेया वर्गया बैसतय्त पाँच थर धंगु अर्थ मदुगु नां बिल । व्यवहार आःतक नं छगू प्रकारं चले जुया च्वंगु दु ।

थुपि लिपाया मल्ल जुजु पिनिगु पालय् बिहार मैथिल ब्रम्हू व बज्जात (ठोक्दे) नं वल । थुमिसं नं नेवाःभाय् ल्हाइगु । तर थुमिसं थःत नेवाःधाये मछा ।

थ्व जुल सनातनी बैसतय्गु खँ । आः बौद्ध पाखे स्वये । पठानतसें बहाः ध्वस्त याना बिसैलि भिक्षु वा बरेत खना मनूत विरक्त जुल । उकि उगु बहालय् वना गृहस्थत भिक्षु, भिक्षुनी जू मवन । त्यं पुत्यंपि भिक्षु, भिक्षुनी वा बरे, बरेनी (मालानी) या ब्यभिचारं ब्रूणि मचातसे बहाः जासेली ज्योतिर्मल्लं थुमित गृहस्थ याना ब्याहा यायेगु नियम दयेका बिल । अनलि भिक्षु, भिक्षुनी जुइगु ज्या शिष्य परंपरां तोफिना सन्तान परंपराय् लावन । थुगु हे इलय् बौद्ध जुया च्वंपि बरे, उराय् ज्यापु आदिया पुरो-हितया ज्या यायेत बरेतय्गु दथुं हे छगू वर्ग गुरु भाजु वा गुभाजु वर्ग दत । बरेत पुजारी जक जुया च्वन । थ्व बौद्ध बिहारय् भिक्षु जुइत बैस व ज्यापुतय् नापनापं सँय्, गुड्ड (फइ), स्यार्पा व मुमित नं वया च्वनीगु जुल । उकि थुपि व्याक्क त्वाकज्याना दुपि गुभाजु, बरे व उराय्तय्गु रङ्गरूप्य छुं भच्चा संगोलक लक्षण खनेदु । थुलिया भरय् छुं विदेशी च्वमितसें व्याक्क नेवाःतय्त मङ्गोलक धायेगु यात । थ्व इमिगु तःधंगु भ्रम खः ।

गुभाजु व बरेत गृहस्थ जूसां थुमिगु बहाः मंका धन हे जुया च्वंगु खः । परदेशीत वया थ्व बहालय् च्वनीबले काइगु किरायया नां नं 'बहाल' जुल । तर वंगु सच्चि दँया दुने थ्व बहाः व्याक्क अन च्वंपि गुभाजु व बरेतसें थःगु सम्पति याना इना काल । चीबाहाः जक मंका जुया च्वन । पिने न्ह्यागु देशय् वंसां थ्व हे बहालय् मवसें गुभाजु वा बरेया बरेछुइगु संस्कार जुइ मछुगुलिं याना धार्मिक केन्द्रया रूप्य थ्व बहाः ल्यना च्वन । आः थन न ब्वनेगु, ब्वंकेगु ज्या जू, न वासःया, न शिल्पकलाया हे । तर थुपि बौद्धतय्के थःगु धर्मय् तस्सकं भक्ति दु । तःमिपि बज्जातसें धार्मिक सेवाया निम्ति गुलि ततःधंगु दान या, उलि सनातनीतसें मया ।

समुद्र थ्यंक कीर्ति पता ब्वयेका धका धाईपि लिच्छवि^{२९} वा ज्यापु-तयगु अवस्था थुपि मल्ल जुजु पिनिगु पालय् नं भच्चा हे मभिन । ज्योतिर्मल्लं थुमित शुद्रय् तया व्यूगु जुल । क्वेया दर्जाया शिल्पया ज्या याईपि माली, चित्रकार (गथु, पुं) नौ, नकमि आदियात ज्यापुयाबे क्वे लाका बिल । थ्व व्यवस्था थौतकं चले जुया च्वन ।

२९. आसागर प्रथित शुभ्र यशोध्वजानां राज्ञां कुलाब्बर शशी भुवलिच्छ-विनाम् (यले च्वंगु नरेन्द्र देवया ६४५ या शिलापत्रं)

मल्लत सिधसेलि श्री ५ पृथ्वीनारायण शाहं व वयकःया उत्तराधिकारी-
 पिसं नेवाःतय्त सेनाय् भर्ना मयायेगु नियम यागुलि क्षत्री धका दावा याईपि
 ६ थरी बैतससें ज्या मदया निराश जुल । तर निजामति ज्याय् कायेगु नियम
 दुगुलि सिगलिलां निसें महाकालीतकया पहाड व तराईया अदालतय् स्मेत वने
 खंगुलि सैनिक बृत्ति मदुसां मदचात । काठमाडौं (यें) राजधानी जूगुलि राज्य
 भरया धन थन मुना बनेज्या आपालं बढेजुल । थ्व ज्या याईपि श्रेष्ठ-बैसत व
 बरे उराय्तसें नं तःमि जुइगु मौका दत । परन्तु इ. सं. १७४० निसें भारतीय
 मारवाडी व बनियांतसें थातं च्वना ये बनेज्या यायेगु अधिकार कासेलि
 थुमिसं भारतपाखें वंगु मालया व्यापार थःगु ल्हाती लाकल । सँदेलिसे जुइगु
 बनेज्या जक बरे उराय्तय्गु ल्हातय् ल्यन । इ. सं. १९४० निसें छुम्बिया लँ
 चासेलि यँ पाखें ल्हासा व्यापारी माल वये वने दिना थ्व व्यापार नं तोफित ।
 उकि मारवाडी व बनियांतय्त थुपि श्रेष्ठ व उराय्तसें लिलाके मफया इमि
 बज्जाः (एजेन्ट) थें जुया च्वन । अय्सां ६ थरी सिबे थुपि उन्नत अवस्थाय्
 लानाच्वंगु खनेदु ।

शाहवंश व राणातय्गु स्मेत शासन व्यवस्था फौजी ढङ्गयागु जुगुलि
 कृषकवर्गया ज्याय्त अगो चुसेजुया ग्निथ्यिन्ह कंगाल जुया वना
 च्वंगु दु । इ. सं. १८१६ स अंग्रेज राजदूत यँ वया च्वंसेलि बेलायती
 ढङ्गयागु छे दयेकूगुलि याना वास्तुकलाया कमितसें यक्को
 ज्या याये खना थःगु अवस्था उन्नत याना च्वंगु दु । शासकवर्गं बेलाइती मूर्ति
 व किपातय्गु आदर याना नेपालय् दयेकीगु मूर्ति व किपातय्गु अनादर याना
 ब्यगुलि उराय व पुंतय्के दुगु थुपि निगू ज्याया तःधंगु दुर्दशा जुया च्वंगु दु ।
 श्री बल बाहू नेपालं थुपि निगू कलायात सँदे व चीन यंकूबले कुबलंखां थें
 जाम्ह तःधम्ह बाच्छानं वइत बडो आदर याना थःगु शिल्पशालाया नायो याना
 बिल । थौं व हे कलायागु थज्यागु दुर्दशा खना सु नेपाःमिया नुगःमख्वइ ?

५. नेवाः भाय्, नेवाःतय्के च्वंगु बैगुन व गुन

आग्नेयदेशी भाषाय् प्रसार जुइगु गुन मदु। थ्व भाय् ल्हाईपि मगः, गुरुङ
 आदि थःगु दे तोता मेथाय् वनी बले छगू निगू पुस्ता लिपा हे थःगु भाय्
 लोमंकी । थ्व खँय् सत्तिगु उदाहरण रुमजाटारया गुरुङतय्गु दु । थुपि लमजुङ
 बा कास्की वया थन च्वंगु निसःदै मदुनि । थुलि म्हो इलय् हे थुमिसं थःगु
 भाय् लोमंके धुकल । थ्व कमजोरी नेवाः भासय् नं दु । नेपाःगाः, वया पूर्व

पाखेया भौत आदि न्हय्गु गां व दोलखा मूछें जुया च्वंगुलि अन नेवाःभाय् ल्हाना च्वन । थ्व भाय्यात राष्ट्र भाषा यायेत मल्ल जुजुपिसं साहित्य व शिला-पत्र स्मैत थ्व भाषां चक्का नेपाल भाषा धका नां छुत । तर परवतिया भाषाय् प्रसार जुइगु गुन दुगुलि थुकि तोषुगुलि घेया जुजु प्रतापमल्ल इ. सं १६६६ या रानीपुखूया शिलालेख्य् थ्व हे भाय् छय्गु खः । भिन्हय्गुगु शताब्दी छुं भक्ता नेवाःत गोर्खाय् च्वेवंगु जुल । इमिसं थःगु भाय् एकदम लोमंका परवतिया भाय्यात मांभाय् नाल । इ. सं. १७६६ निसें १९०५ तक छुं नेवाःत नेपाःगाल् पितिगु जुल । थुपि पोखरा, धनकुटा, डोटी आदि थासय् च्वंवन । थुमिसं नं थःगु भाय् लोमंके धुकल बा लोमंकेत तयार जुइधुकल । लिपा थः छुसि पिनै च्वंविपनिगु नं थ्व हे पहः ।

तर थ्व भाषाय् ख्वपया जुजुपिसं आपालं प्याखे च्वया पुलांगु नृत्य कला व रागयात रक्षायाना तःगु दु । परतिया भाय्या दकसिबे पुलांगु नमुना नं थुपि प्याखनय् दु । उकि थ्व भाय्यात उद्धार यात धाःसा जक हे नेपाली संस्कृतिया नृत्यकला, रागविद्या, गानविद्या उद्धार जुइ फइ । तर आर्य भाषाया न्हूगु शब्द जायेका न्हूगु साहित्य तयार यात धाःसा थ्व भाय्यात कुठाराघात जुइ, उद्धार जुइ मखु । उकि नेपाली विद्वानपिसं थ्व भाय्या दतले पुलांगु शब्द व व्याकरणया नियम माला पुलांगु थासाय् थानावं यंकल धाःसा राष्ट्रिय सम्पत्तिया उद्धार जुइगु आस दु ।

आर्य व आग्नेयदेशी नस्ल मुना दुगु थौंकन्हेया ७० लख नेपाली जनताय् स्वंगु लख नेवाःत दु । उकि मध्ये निगु लखति थःगु मूछे दु । थुपि आर्य नस्लया खःसां आग्नेयदेशी भाषा नस्लया नातां आर्य जनता नाप भाय्या नातां आग्नेय जनतालिसे सम्बन्ध स्वाना निगु नस्लयात स्वायेगुली चुकूया ज्या ब्यूगु दु । थुमिके छगू तःधंगु गुन दु-नागरिकता । थ्व गुनं याना थुपि थवंथः छपा जुया च्वंगु दु। इपि थवंथः मिले जुया च्वने यो, ब्याग ब्याग मखु । शहरय् जुइमा बा गामय् छुछाछे स्वाक्क हे मेगु छे दनी । तर थ्व गुनं छगू बेगुन नं थुमिके दत । थुपि मेथाय् वना चाहिले मफु । पहाड बा तराईले हाकिम जुया वनीपि बा व्यापार यावनीपि नेवाःत थःगु अड्डा अदालत बा बजारं तापाक आपा मवं । मेगु जात च्वंगु गांया ख्वथ्यंक वना हाल-चाल सीकेगु इच्छा थुमि साप हे ह्यो । तर थौंकन्हे थ्व बेगुन तनावं वंगु दु ।

नेवाःत मध्ये मुख्य जुया चर्वाप ६ थरी बैसतय्के तःधंछू अपोगुलि थवथः
 व्याहाबारी व नये त्वनेगुली नं नातिकुति याइगु । थुमि जातपातया क्रम नं स्वा-
 हाने थें च्वे क्वे ला । सरकारी नोकरीया घृति कया तःगुलि सरकारया वा च्वेया
 हाकिमया दवाबं मखुगु व्यवहार यायेगु बानी थुमिके दु । सूदखोरी व जुवा-
 खोरी नापं यासा तडक मडकं फायें फुई याना च्वनीगुलि पांचथरी श्रेष्ठत तःमि
 मजू । पांचथरीत बनेज्या याइपि जूगुलि विश्वास बटेयायेत व्यवहारय् इमान्दा-
 रीया अपो बिचाःया । बौद्धत भन इमान्दार जू । लुं वहःया ज्या याइपि बरेत-
 य्त छुं लिखत मकासे हे दोलंदोया माल व्यूसां मकया गुलसं धाइ मखु ।
 शिल्पया ज्या याइपि उराय्तयके नं बेईमानी आपालं ह्यो । तर म्यादया दुने ज्या
 सिमधयेकेगु छगू मभिगु बानी दु । बुई ज्या याइपि ज्यापुत ला भन हे ईमा-
 न्दार, सोभ । व मेहनती । थुमिके सह यायेगु बानी दु । थूमि मिसात नं ईमा-
 न्दार । चीमि जुया मेपिनिगु छेचें भ्वाति च्वना मन स्यंकूपि कथित बाहेक मेपि
 कथितय्के व्यभिचारया नं हे खने मवु । मेहनति नं भाःतति हे जू ।



नेपाःपा प्राचीन मूल संस्कृति

सभ्यता व संस्कृति अलग छःसां सभ्यताया सारं संस्कृतिया निर्माण जुजु वनीगु जूगुलि निगुली नित्य सम्बन्ध दया चवनी । मनू जाती सहयोगया भावना ब्वलना समाजया निर्माण प्रारम्भ जुसेलि सामाजिक नियम थीर यायेत सभा चवनी । सभाया नियम कथं चवनीगु समाज सभ्य धाइ । सभ्य समाजय् दुगु गुनया नां सभ्यता छः । संसारय् सकभन सभ्यताया उत्थान छगू हे इलय् जूगु मखु । गनं च्यावो भिदो दे पुलांगु संस्कृतिया चिन्हः लुया वगुलि अन उलि हे न्हापा सभ्यताया उत्थान जूगु व गनं गनं थीं नं मनूतय् बथां जंगली अवस्थाय लाना चवंगुलि सभ्यतां तापावक चवंगु खनेदु । दृष्टान्त कथं नेपाःहे छगू संग्रहालय जुयाचवंगु दु । थन आपा पुलांगु सांस्कृतिक चि लुया भवो । अस्सां २५०० दे न्ह्योनिसेया कलात्मक चि लुया वो । मेपाखे थव हे नेपालय् अधंसभ्य अवस्थाय चवना चवंपि चेपाङ, राउते आदि व बिलकुल असभ्य अवस्थाय चवना चवंपि राजी, कुशुण्डा आदि नं दु ।

संस्कृतिया चि ललितकला अथवा साहित्यकलाय् प्रकित जुया चवनी । सिन्धु खुसिया गालय् उत्थान जूगु सिन्धु सभ्यताया चि, वास्तुकला व मूर्तिकलाया रूपय् लुया वोगु दु । अन हे साहित्य कलाया चि कथं मुद्राय व मेथाय नं अत्यल्प मात्राय उगु ईया आखा । लुया वोसां ब्वने मफुनि । थव अनार्य संस्कृतियात संहार यापि भारतीय आर्यत ललितकला मस्यूपि जूगुलि इमिसं साहित्यय् हे थगु संस्कृति तोता वंगु दु । दमुया निम्ति संस्कृत भाषाय शिपालुया अर्थय् 'कुशल' व 'प्रवीण' शब्द प्रयोग जुया चवंगु दु । आर्यतसे शिल्पकला जुक्वो अनार्य शूद्रया जिम्माय तोता व्यंगुलि यज-योगादी कुशया बस्तु दयेकेगु व बिनोदया निम्ति बीणा थायेगु ज्याय् इपि शिपालु जूगुलि, शिपालुया अर्थ हे थपि निगु शब्द लिपा व्यवहार जूगु खनेदु । 'शिपालु' शब्द छश भाषाया जूगुलि व थुर्किया सम्बन्ध 'शिल्प' नाप खने दुगुलि 'खश' आर्यत शिल्पकार जूगु खनेदु । भारतीय

आर्य व खश आर्यया श्व सांस्कृतिक भिन्नता ध्यान बी जोग्य जू ।

वर्तमान इल्य् सिंगलेला पहाड व मेची खुसि पश्चिमपाखे महाकाली तक्या हिमाल, पहाड व तराई समेत जाना नेपाःजुल । श्व नेपाःया जनताय् किरांत व बूजी (बाजी) नं थ्या । खश व बूजी आर्य जातिया जुया नं आपालं पागु कचाय् लागुलि थुमिगु सभ्यता व संस्कृति त्वाकज्याना नेपाली सभ्यता व संस्कृति जूगु चर्चा क्वय् याये ।

वर्तमान युगय् थनि निसः दे न्ह्यो गोरखाय् किरात जातीया मगः व गुरुङ्यात मिलय्याना आर्य जातिया खशतसे गुगु न्हूगु सभ्यता व संस्कृतिया उत्थान यात, श्वेत गोरखा संस्कृती धका नां छुये उचित, तर थुगु सैनिक संस्कृति गोरखां पश्चिमपाखे लमजुङ-तनहुँनं प्यूठान तक्या प्रदेशया खश, गुरुङ व मगःत नं मिलेजूगु व गुबलें गुबलें पूर्वपाखेया खम्बू व लिम्बु नं मिलय् जुइगुलि गोरखा धंगु प्रान्तीय नां छुइ उचित मजगुलि 'गुर्खा' धंगु अंग्रेजी नां चलयाये उचित खनेदु । आः श्व सैनिक जातिया केन्द्रस्थल गोर्खा अजुसे पोखरा जुवोगु दु । थौं-कन्ह्य् सभ्य संसारय् नेपाली जनताया प्रतिनिधित्व याइगु श्वहे जुल । लुमके माःगु खँ श्व खः कि गुर्खा जाति नेपालीया दुनेला; गुर्खाया दुने नेपाली मन्ह्यो । श्री ५ पृथ्वीवारायण शाहया नेतृत्वय् गुर्खा जाति उगु बखतया नेपाली (नेवाः) यात त्याका न्हूगु राज्य दयेकूसां श्व नेपाली जातिया ललितकलात्मक सभ्यता व संस्कृतिले बुना काठमाडौं राजधानी याना थःहे नेपाली जुल । थुकथं गुर्खा तय्गु सांस्कृतिक पराजय व नेपालीया सांस्कृतिक बिजयं दुगु श्व नेपाली राष्ट्र ८४ लाखया आबादी जुया संसारय् नां चलय् जूगु दु । श्व आधुनिक नेपाली सभ्यता व संस्कृतिया बिषय खः । नेपाःया प्राचीन मूल संस्कृतिया अन्वेषण यायेपु श्व लेखया मुख्य उद्देश्य खः ।

नेपालय् सभ्यताया आरम्भ इ. सं. या सिबे न्हय्सः च्यासः दे न्ह्यो निसे बूय अनुमान या । थुबले निसे नेपालय् बौद्ध व शैव तान्त्रिक सम्प्रदायया उत्थाव मजतलेया अन्दाजी भिस्वसः देया समय प्राचीन काल धाइ । व प्राचीन कालया मूल संस्कृति अन्वेषण यायेत भगवान गौतम बुद्ध व मौर्य जुजु अशोकया ईया संस्कृत साहित्यया अन्वेषण छलेपाखे व मेपाखे मध्य युगया अन्त्य तक खशत सखिका लेकनिसे पूर्वपाखे वना चल्ने मक्या किरात जातिया जक निवास जूगुलि श्व जातिया भाषा व सामाजिक प्रथा आदिया नं अन्वेषण याये मागु दु । मध्य युगय् युवान च्याङया भ्रमण वृतांत कथं सिंगलेलानिसे कया सखिका लेक

लक्या किरांत देश नेपाःया दुने थ्याकीगु व थ्व देय्या मध्य भाग्य बागमती खुसिया फुसय् च्वंगु गालय् नेपाःया केन्द्रस्थल जुया च्वंगु खनेदु । थ्व केन्द्रस्थल्य गौतमबुद्ध व अशोकया बखतया गुगु मूल संस्कृति ल्या वो, वैंत हे नेपाःया मूल संस्कृति धाये मागु खनेदु । थ्व केन्द्रस्थल दुगु गालय् दुपि नेवाः जाति, प्राचीन कालनिसें च्वना च्वपि खः धंगु प्रमाण आपालं दु । थ्व जाती खनेदुगु जातपात व छुवाछुतया भेदभाव, भारतीय आर्य सभ्यताया लक्षण खः धंगुली सन्देह मदु । नेवाः जातिया जनताया थौंया रंग रूप व मध्य युग्य ल्या वोगु मनूया मूर्ति अंकित म्हाया नक्साय् नं आर्य-लक्षण खनेदु । तर नेपाल भाषा आर्य भाषा वर्गया मखु, किरांत भाषा वर्गया खः । अथे ला प्रियर्सन आदि भाषा-विज्ञपिसं नेपाल भाषायात सैय् भाय्या भोलय् तथा तंगु दु । खुगुगुः शताब्दी-या आखीरय् कुति व केरुङ्पाखें संदेशय् वयेवने यासैलि सैय् भाय्या प्रभाव अप्पो लाना नेपाल भाषा नं सैय् भाय्या व्याकरणया थासय् थन जुई । तर प्राचीन युग्य इतिहास कालं न्ह्यो आसामपाखें सैय्तय् छुं दल वया च्यापुगुया किरात जाती दुबिना वंगु लक्षण गनेदु । अय्सं लिम्बु, खम्बू व थामि आदिया भाषाय् इपि सैय्तसैं छुं प्रभाव लाके मफ्या किरांत भाषाया मुख्य लक्षण सार्वनामिक रूप दया च्वंगुलि प्राचीन युगया नेपाल भाषाय् सैय् भाय्या प्रभाव लाइगु नं सम्भव मजू ।

थुकथं वर्तमान समयया व मध्य युगया नेवाः जातिया रंग रूपय् आर्य-लक्षण दुगु व भाषाय् किरांत लक्षण खने दुगु साप हे ज्यामर्छिगु समस्या खः । थुकिया समाधान निगू कथं जुइफु —

(१) नेवाःत न्हापा किरात जातिया खः, थःगु भाषा हीक्य आर्य जुल; अथवा

(२) नेवाः आर्य जातिया खः, लिपा थःगु भाषा तोता किरात भाषा ज्वन ।

थुपि निगू तर्कय् न्हापांया असंभव, निगूगु संभव जू । इतिहासं नं ई. स. १०० या आसपासय् उत्तर बिहारं लिच्छवीत वया किरांततय् हटय्-याना इमिगु राज्यय् अधिकार यागु खनेदुगुलि किरातयात हटय्यागु खनेदु । लिच्छवीत वृजी जातिया भारतीय आर्य खः । थुमिसं किरांततय् राजपाठ कासैलि थुमित बुलुहें बुलुहें बागमतीया फुसेच्वंगु गालं चीका इमिगु भाषा व सभ्यता नापं कासैलि आर्य जातिया खल्लाबल्लाया भाषा किरातवर्गया जूवोगु प्रष्ट जू । थ्व खें नेपाल, नेपार व न्यार्पा शब्दया व्युत्पत्ति प्रष्ट जू ।

‘नेपाल’ शब्द दक्षिणे न्हापां मौर्य जुजु चन्द्रगुप्तया मंत्री कौटिल्ये इसवी संबत्थावे स्वसः दे ति न्ह्यो ख्वग् अर्थशास्त्रय् दु । उग् बखतया बिहारया मागधी भाषाय् ‘र’ या पल्सा ‘ल’ नोवायेग् नियम दुग्लि मंगधया राजधानी पाटलीपुत्रय् च्वग् अर्थशास्त्रय् मागधी उच्चारण कथं ‘नेपार’ या पल्सा ‘नेपाल’ ख्वग् स्थानीय भाषाय् नेपारया नेवार’ जूग् व पित्तं पि नेवाः त सुमि (तामाङ्) लिसे ल्वाकज्या धंसैलि उच्चारणया-भेदं ‘न्यार्वी’ धागु खनेदु ।

आः सीदत कि प्राचीनतम नेपाःया क्षेत्र तःधं मजू । नेवारतय्ग् आवादि दुग् वर्तमान नेपाःगाः व वया पूर्व पाखेया चिधंगु क्षेत्र थुकी थ्या । थ्व प्राचीनतम नेपाःया मूल निवासी नेपार नांया किरांति जातिया छग् चिधंगु कचा दुग् खः । थ्व कचाया सभ्यता कालय् खने दुग् संस्कृतियात हे नेपाःया प्राचीन मूल संस्कृति मानय्थाये फु । सखिका लेकं निसै कया सिंहबेला तकया किरांति जातिया आवादी न्हापां सभ्यताया उत्थान गथे जुल धंगु न्ह्यसः बिचाः याये बहू जू । सभ्यताया उत्थानया निस्ति न्हापां छग् सभ्य जातिलिमे सम्पर्क जुड मा । निग्गु, आर्थिक उत्पादनया प्राकृतिक साधन दयेसा । उत्तर भारतय् आर्यत वया आवाद जुया सभ्यताया प्रसार यागु दोलंदो दे तकं थ्व सभ्यताया जः थ्व गालय् जक मखु, च्वापुग् या पूर्व भागया पहाड खण्डय् मनं नं थ्यंगु खने मदु । महाभारतया प्रसिद्ध जुद्ध जूग् प्यसः न्यासः दे लिपा उत्तर भारतय् आपालं जनपद राज्य थापना जूबले उत्तर बिहारय् बृजी व मल्ल नांया निग्गु प्रजातंत्र-राज्य थापना जूग् खनेदु । थुमिसं हे महाभारतया गुंनिसै दक्षिणपाखेया हिमालयया तराईल्य् च्वंपि किरांति वर्गया थारू जातियात आर्य सभ्यताया शिक्षा बिसैलि थुपि थारुतसै आर्य सभ्यता ग्रहण याना आर्य भाषा नालाकागु खनेदु । थुपि हे थारू वर्गया चाया थलबल दयेवेग् ज्या याइपि कुम्हाः व न्या लायेग् ज्या याइपि दनुवाः त न्हापां गण्डकिया सिथं सिथं महाभारत पहाड पुला पाहाड दुने वना नेपाः गाःया पश्चिमोत्तरपाखे आवाद जुल । लिपा कमला खुसिया सिथं सिंधुलि भाज्याड पुला सुनकोशीया सिथय् व थ्व गाःया पूर्व भागय् तथा बागमती सिथं दुहां वना गाःया दक्षिण भागय् नापं वया आवाद जुसैलि थुमिसं हे दक्षिणे न्हापां नेपालय् आर्य सभ्यताया जः हगु खनेदु । कुम्हाः व दनुवाः तय्ग् सहवासं नेवारत नं बृजीतय्ग् देशय् व मागधय् वना सभ्यताया शिक्षा कया वोर्गुलि थुग् बखतनिसै थुमिसं सभ्यताया न्हापांगु त्वाथल्य् पदार्पण यागु खनेदु । थ्व अन्दाजि ईसवी संबत्थावे न्ह्यसः च्यासः दे न्हापाया घटना खः ।

नेवाःत सभ्यताया त्वाथल्य ग्या नं न्हापां बुज्यापाखे ल्यूगु खने महु । पशुपालक जुया हे च्वनाच्वंगु खनेदु । थुमि मुख्य पशु भ्याय्चा खनेदु । शायद, सा महु जुइ । संभवत आर्य सभ्यताया जः लाये न्ह्यो थुपि पशु लहीगु अवस्थाय् थ्यंगु जुइ । महात्माबुद्धया निर्वाण जुइ छुं बं न्ह्यो कपिलबस्तुई च्वपि शाक्य-तय्त कोशलया जुजु बिडुडवं संहार घासे लि शरणार्थी शाक्यत नेपालय् घोगु खः । इमिगु हालचाल सीकेत बुद्धयः प्रमुख शिष्य आनन्दयात नेपाः छ्या हबले वय्कलं नेपालय् बिज्याना इमि व्यापार चलय् जुया च्वंगु खन, अले ऊनी न्या-वोपि व्यापारीतलिसे हे लिहां नं बिज्यात । थ्व खं 'सर्वास्तिवाद विनय संग्रह' धँगु संस्कृत ग्रन्थय् च्वया तगुलि घटना-कालयाबे आपालं शताब्दी लिपा च्वगु खने दसां थुकिया पुष्टि कीटल्यया अर्थशास्त्रं नं जूगु दु । थूकी नेपालं मगधया राजधानी पाटलीपुत्रय् मी यंकीगु बस्तुई आपालं प्रकारया ऊनी कापया चर्चा याना तःगु दु । उकी हे 'मिङ्गिसी' नांया च्यापाटा दुगु वां मप्याइगु हाकुगु घूम राढीया चर्चा याना तःगु दु । थुकि प्राचीन नेवार बा नेपालीत भ्याय्चा लहिना ऊनया का निला रंगय्याना काप थाइगु धँगु खं नं प्रष्ट जू । महात्माबुद्धया जीवन-काल तक नापं च्वंगु बूजी व मल्ल राज्य प्रजातन्त्र जगुलि नेपालय् गठन गूगु किरांत राज्य नं प्रजातन्त्र जुइगु स्वभाविक खः । उगु बखतय् राज तन्त्रया गुंजायस हे महु । इ. सं. प. ४८० पाखे बूजी व मल्ल प्रजातन्त्र राज्य-त मगधया राजतन्त्र राज्यय् मिलय्याना कागुलि थुगु हे बेलनिसें किरांतया राज तन्त्र जुल जुइ । थुमि धर्म थौंकन्हया खम्बू बा लिम्बुतय् थें उपासना मूलक जूगु खइ । उगु बखतय् मूर्तिपूजाया नां हे नं भारतय् महु । भारतीय आर्यतसें अनार्यतय्त यज्ञ, योग आदि याके मव्यू । उकि आर्य धर्म कायेगु ला छुखेया खं, आर्य भाषा नं थुमिसें मनागुलि लिपा वोपि बूजी जातीया लिच्छवीतसें नं कि-रांत भाषा काये बाध्य गुल । थुपि लिच्छवीतसें खालि साहित्यिक भाषाया रुपय् संस्कृति भाषायात काल ।

किरांत जाती, आर्य जाती थें वर्णभेद महुगुलि व्याक्क नेपारत समान हे जुल । लिपा लिच्छवीतसें व लिच्छवीं लिपा बैश्य, मल्ल आदि नं बिधवा बिवाह यायेगु व बिवाह सम्बन्ध बिच्छेद यायेगु गुगु अनार्य प्रथा चलय्याना तल व थौं तक नं चलय् जुया च्वन, व नं थुपि नेपारतय्गु प्रथा परस्परांनिसें चलय् जुया वयाच्वंगु खनेदु । थुपि निगू मिगु प्रथां हे लिपाया नेवाःतय् बिचय् सामाजिक संगठन बल्लाना घोगु खनेदु । उकि प्राचीन नेपाःया मूल संस्कृतिया चि स्वरूप बिधवा-बिवाह व बिवाह बिच्छेद, नेवाःजातीइ थौं तक नं दया दया च्यन ।

प्रकृति श्व नेपाःगाःया निवासीतयत् अनेक प्रकारया आर्थिक सुविधा प्रदान यागुदु । बागमती व वया सहायक खुसि गाःया मध्य भाग सिंचित जू । छ्वाखेरं च्वंगु फेदि पिहाँ वोगु ब्वग्वालखं त्यंगु भाग नं सिंचय जू । थौकन्ह्यु थें पाखा, पाः उगु बखतय् म्दु । खुसि-व्या थौयाबे स्वस्व तव्या। प्राय न्ह्याथाय् नं व विशेष याना दक्षिण भागय् कंचाया खानी आपालं दुगुलि बुँया निम्ति सा कम मज्जू । उकि उत्तर बिहार नाप सम्पर्क जुसेलि नेपारत बुँज्याय् शिपालु जुल । श्व बुँज्या-कला, चा व ल-फय्या भेद भारतीय मँदानया कृषि कला-लिसे पात । श्व नं नेपाःया प्राचीन मूल संस्कृतिया चिं खः । श्व गाःया दक्षिण भागय् च्वंगु चन्दागिरी व महाभारतया पहाडया दथुइ च्वंगु टिस्टुङ्ग निसें बिहा-वर तकया गुँइ सिजः, नँ, म्हः व टीनया खानी आपालं दुगुलि बस्तीं २५,३० माइल तापागु श्व खानी धातु लिकायेगु सौभाग्य प्राप्त जूगुलि गाःया दक्षिण भागया, थौकन्ह्युया यल देशय् उबलेनिसें शिल्पकलाया बिकाश जुया वोगुलि छुंछुं अप्पो शिल्पकला मेथाय्याबे अप्पो दु । श्व नं प्राचीन मूल संस्कृतिया छगू ल्यं-पुल्यं खः ।

थौकन्ह्यु यलया गुगु बौद्ध बिहारयात 'यम्पी' धया च्वन, वयात अशोकं दयेकूगु खः धका अष्ट बाखं चलय् जूगु दु । अशोकं दयेकूगु चैत्य भारतय् गनं मंदयेकूनिगु सच्छि दँ न्ह्यो निसें, उगु बखतय् बुद्ध व बोधिसत्वया मूर्ति दयेकेगु कलाया आबिष्कार मज्जनिगुलि, बुद्ध व बोधिसत्वया मूर्ति दुगु श्व चैत्य अशोकं दयेकेगु असम्भव खः । इ. स. ६४५ या अन हे च्वंगु नरेन्द्र देवया शिलालेखय् 'यूप ग्राम' या नां वोगु दु; श्व हे नांया बिकृत रुप 'यल' थौकन्ह्यु पाटन शहरया पर्याय जुया च्वंगु दु । यूप बिहारया छोटकरी रुप 'यम्पी' खनेदु । अशोकं हिमालयया प्रदेशय् बौद्ध धर्म प्रचार यायेया निम्ति मञ्जिभूम आदि धर्मदूत छवयाहगु खः । श्वयापाखें मेपि अर्ध सभ्य किरांततसे बुद्धया सन्देश मथुया खालि सभ्य जूयि नेपारतसे जक व शान्तिमय सन्देश ग्रहण याना बौद्ध सम्प्रदायया दीक्षा कायेगु आरम्भ यागु खनेदु । श्व बौद्ध सम्प्रदाय नं प्राचीन नेपाःया मूल संस्कृतिया छगू महत्वपूर्ण प्रतीक जुइगुली सन्देह मैदु ।

थुपि बाहेक किरांति संस्कृतिया मैगु चिं न पुलांगु नेपाल भाषा साहित्यय् व बाँया तलय् दुबिनाच्वंगु खण्डहरय् लुया वंगु संभावना अप्पो दु, तर श्व अन्वेषणया ज्या थायेगु ईःवया च्वंगु दु । जय नेपाल !



मूलखाया प्रकाशन

१. भीगु म्ये —मुंहा क्षेत्रवहादुर कायस्थ
२. रूपा (प्याखं) —स्व० हेमलाल जोशी
३. जुजु सिद्धिनरसिंह मल्लया
म्ये पुचः —सं० छत्रवहादुर कायस्थ
४. उपहार (गोतीकाव्य) —छत्रवहादुर कायस्थ
५. नेपाल सम्बत छगू विवेचना —छत्रवहादुर कायस्थ
६. नेपाल भाषाया प्राचीन
काव्य व काव्यकार —सं० छत्रवहादुर कायस्थ
७. शिवरात्री पर्वकथा —सं० छत्रवहादुर कायस्थ
८. भीगु म्ये (निगूगु) —सं० छत्रवहादुर कायस्थ
९. बी निभाः (चीबाखं) —भूषण प्रसाद श्रेष्ठ
१०. विदेशी विद्वान व
नेपाल भाषा —न्याहा चवमिया संयुक्त कुतः
११. जि छन्त याकन काप्के हय् —स्व० भैरव गोपाल
—सं० कुमारधर शर्मा 'ज्ञानी'
१२. भीगु म्ये (स्वंगूगु) —सं० छत्रवहादुर कायस्थ
१३. सितु माः (बाखं मुना) —सुन्दरकृष्ण जोशी
१४. नेवाः, नेवाः भाय् व
संस्कृति —स्व० बाबुराम आचार्य
—अनु. स्वयम्भुलाल श्रेष्ठ
१५. श्री श्री श्री मुद्रा राक्षसकथा —सं० छत्रवहादुर कायस्थ